



SAOPĆENJE ZA JAVNOST

Muharemoviću tri godine i mjesec zatvora Pokušao ubiti policajca van dužnosti

(Brčko, 9.9.2024. godine)

Tužilaštvo Brčko distrikta BiH okončalo je postupak u predmetu protiv Senada Muharemovića (33)*, optuženog da je šestog juna u Brčkom pucanjem iz pištolja pokušao lišiti života policijskog službenika J. T. On je za pokušaj ubistva policajca, koji nije bio na dužnosti, te za neovlaštenu nabavku, držanje ili prodaju oružja ili bitnih dijela za oružje, nepravosnažno osuđen na tri godine i mjesec zatvora.

Tužilaštvo Distrikta nedavno je podiglo optužnicu protiv Muharemovića zbog sumnje da je 6. juna oko 02,30 časova u ulici Mostarska, ispred ugostiteljskog objekta *Belvedere*, pucanjem iz pištolja, za koji nije imao dozvolu, pokušao lišiti života J. T. Kako se navodi u optužnici, nakon što su prethodnog dana u večernjim satima zajedno sjedili u navedenom objektu, njih dvojica su se odvezli na brčanski carinski terminal, gdje su pred prijateljem E. T. započeli verbalni sukob. Nakon toga, E. T. je optuženog povezaao do objekta *Belvedere*, dok ih je oštećeni pratio i sustigao na parkingu tog objekta, gdje su nastavili verbalni sukob. Zatim je optuženi, dok se J. T. nalazio u automobilu, iz svog vozila uzeo pištolj i iz neposredne blizine ispalio sedam hitaca prema njemu. Kako se zaključuje u optužnicu, on je oštećenog pogodio u lijevu nadlakticu, nanijevši mu tešku tjelesnu povredu, i na više mjesta oštetio vozilo u kojem se nalazio J. T, nakon čega se s trećim licem odvezao s lica mjesta.

Pošto je ubrzo lociran i uhapšen, Tužilaštvo i Policija intenzivno su nastavili daljnje procesuiranje Muharemovića u okviru istrage usmjerene na krivična djela pokušaj ubistva i nedozvoljeno držanje oružja. Efikasno sprovedena istraga okončana je za manje od tri mjeseca, 28. avgusta, kada je Tužilaštvo protiv njega podiglo optužnicu za krivična djela ubistva, u pokušaju (*iz člana 163 Krivičnog zakona Brčko distrikta*) i neovlaštene nabavke, držanja ili prodaje oružja ili bitnih dijela za oružje (*iz člana 65 Zakona o oružju i municiji Brčko distrikta BiH*). Po potvrđivanju optužnice, optuženi i Tužilaštvo zaključili su sporazum o priznanju krivice, nakon čega mu je sud izrekao jedinstvenu kaznu zatvora u trajanju od tri godine i jednog mjeseca. Prethodno mu je za pokušaj ubistva utvrđena pojedinačna kazna zatvora u trajanju od tri godine, dok mu je za neovlaštenu nabavku, držanje ili prodaju oružja ili bitnih dijela za oružje utvrđena zatvorska kazna u trajanju od dva mjeseca. Jednako kao i Tužilaštvo, optuženi presudu može pobijati žalbom, izuzev u dijelu koji se odnosi na krivičnu sankciju. Po izricanju presude, sud je optuženom posebnim rješenjem ukinuo pritvor, koji mu je bio određen odmah pošto je uhapšen usljed opasnosti da bi boravkom na slobodi mogao ponoviti ili dovršiti pokušano krivično djelo. Uspješno vođenom istragom i efikasnim procesuiranjem optuženog krivični postupak u ovom slučaju nepravosnažno je okončan za tačno tri mjeseca.

*Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.

GLAVNI TUŽILAC

ZEKERIJA MUJKANović